

L'augsegner da Rüti less turnar in di a Dardin

En sias plaivs sgulatscha adina ina bandiera Grischuna

DA CLAUDIA CADRUVI / ANR

■ **Chavels plitost lungs grischs creschan davos il chau blut giu. Sia fatscha è lomma, ins schess bunamain buntadaivla, e fitg averta. En ses eglis datti ina sbrinzla trista. Ma l'allegria ed insatge sulegliv domineschan per lunsch ora. L'augsegner Tarcisi Venzin da Rüti ha fatg festa l'avrigl. 40 onns èn passads dapi sia messa nuvella. E sch'el raquinta da tut quests onns ch'el ha fatg pastoraziun di el adina puspè: «Igl è stà in bel temp» u «Jau sun ò daventavidis ord questa plaiv». Be ina giada lascha sur Venzin sentir disgust e di a moda furiosa: «Quai lamentim adina, dat a mai sin la gnerva.» El manegia cun quai las lamentaschuns permanentas davart la mancanza da spirituals e sur dals temps schlets. «Il pli gugent avess jau in scumond da lamentar per in onn en baselgia.»**

Massa fragliuns

«Sch'jau fiss in giuven ed udis trasora mo negativ dad ina firma, alura na faschess

Curt e bun

Num: Tarcisi Venzin
Naschi: 23 da november 1933 a Dardin, burgais da Sedrun
Domicil: Tann/Rüti
Spisa preferida: risotto con funghi
Bavronda preferida: bun vin
Musica: flauta da pan
Hobi: bunas discurreidas e cursa lunga



En tut las plaivs nua che sur Tarcisi ha lavurà, ha adina sgulatschà ina bandiera grischuna.

ANR

jau betg l'emprendissadi tar questa interpresa», remartga Venzin. El sez na vesa numnadamain betg nair pertutgant las baselgias. «Cler che nus essan en ina crisa», conceda il prer. Ma ord crisas creschian savens bunas schliaziuns per il futur.

Quai che Venzin raquinta da sia vita sco spiritual, tuna en mintga cas encuraschant per insatge che ponderescha da dedicar ses far ed operar a la «firma catolica».

Naschì è Venzin a Dardin il 1933. El e creschì si en ina famiglia cun diesch buobs e duas mattatschas. Damai che sia tatta raquintavia savens da missiunaris, ha il giuvenot survegnì gust dad ir a «gidar ils pajans». Oz po l'augsegner rir da las ideas ch'el aveva davart las missiuns. Ma effect han questas imaginaziuns fatg. Tarcisi è ò a Rebstein ed Immensee en ils gimnasis per ils futurs missiunaris. Cura ch'el ha sur-

vegnì en la 6avla classa tuberculosa, ha el dentant dà si ses plans cun las missiuns ed ha fatg enstagl il seminari da spiritual a Cuira.

Horgen – Bülach – Rüti

«A Horgen vegnis Vus a chattar blera lavur. E prendai si contact cun il plevon.» Cun quests paucs plects ha l'uvestg Caminada ditg il 1961 al giuven spiritual nua ch'el daventia vicari. Oz vegniss questa decisium prendida cun dapli discussiun, manegia sur Venzin. «Ma da lezzas uras na vegniva nuota dumandà. Ed ins na fiss era betg sa rebalzà.» Dal temp da vicari a Horgen sa regorda el fitg gugent. El aveva propri chattà blera lavur. Ma el pudeva era s'occupar da tuttas sorts uniuns da giuventetgna e quai ha plaschì immens bain. Cura ch'i ha tutgà da tilar davent, a Bülach e daventar augsegner, ha il cor fatg mal da bandunar Horgen. Da l'autra vart

eri captivant da surpender sez la responsablidad en ina plaiv da 15 vischnancas e 7000 cartents. A Bülach ha Venzin tratg si la bandiera grischuna avant sia chasa-parvenda e pli tard en la plaiv da Rüti era. A Horgen, sco vicari, na fiss quai anc betg stà pussaivel.

Sur canoni?

Avant dus onns è sur Venzin vegnì elegì en il chapitel catedral. En sasez è el in «sur canoni». Ma el na dat betg blier sin titels. Impurtant per el tar questa funcziun è la s'entupada cun confrars e las autoritads. Igl è ina chaschun da sa discurre e tshertgar da cuminanza schliaziuns per il futur. Sur Venzin è era suenter 40 onns en la pastoraziun betg unfis da sia clamada. Pastoraziun vul dir per el: Esser fitg avert e tshertgar da trair natiers ils cartents «anonyms» en la plaiv. Plinvant vul el era porscher in agid da viver al concarstgaun. Sia filosofia è d'emprim tadar tge che la glieud di. «Forsa ch'ins tshantscha oz memia spert e na dat gnanca resposta sin las dumondas da noss temp.» Perquai taidla sur Venzin l'emprim ina giada. El taidla, era sch'igl è in cartend che less extrar ord la baselgia. La resposta che Venzin dat savens a questa persuna è: «N'emblidai mai, las portas da la baselgia stattan era suenter adina avertas per Vus.»

Fa gugent festa

Quai che gida e dat curascha a sur Venzin èn duas chaussas: «Jau hai in grond maletg da Diu. En quest maletg ha tut plaz.» Impurtant saja era d'adina puspè far festa cun parents, en familias, cun confrars ed en las plaivs. In pievel u ina plaiv che na

po betg far festa fiss fitg paupra. Las davosas festas da sia vita, lezzas less sur Venzin in di far a Dardin. Là less el turnar in di, daventar vegl e murir. E là na vegn el betg pli a stuair trair si la bandiera grischuna.

P. ex. ina schanza en la crisa

«Jau hai gi cletg», di Venzin pertutgant las differentas plaivs, nua ch'el ha lavurà. «Jau n'avess mai vuli esser persul en ina plaiv.» El haja adina lavurà en sias plaivs cun in vicari u auters spirituals e laics. El saja perquai sa senti sco en ina famiglia. Ord questa experientscha pren sur Venzin era sia idea, co ins pudess schliar la mancanza da pres en las valladadas grischunas. Ins pudess introducir ina uschenunada «Grossraumseelsorge» che funcziunescha sco suonda: Trais u quatter spirituals lavuran ed abiteschan ensemen en in center. Da là anora s'occupan els da las singulas plaivs e dals differents vitgs. Uschia n'èn ils plevons betg pli isolads e pon profitar d'ina stretga collavuraziun. «Ina plaiv viva sch'ella ha la voluntad da viver», è sur Venzin persvadì. I na saja betg fatg cun guardar vers Cuira e spetgar ils verdicts da l'uvestgieu. Las iniziativa stoppian vegnir or da la basa da las plaivs.